


Embeyecimento di Centro di Oranjestad ta bay destaho publico



E parti di embeyecimento di centro di Oranjestad, como parti di renobacion di centro di Playa, ta bin na turno awor. E renobacion ta consisti di diferente fase cu ta parti di un solo proyecto.

E parti di embeyecimento ta bay wordo ehecuta den e dos kwartaal di 2012 y mester ta cla pa final di aña.

E proyecto aki ta forma parti di e plan integral di Gabinete Mike Eman, BoAruba pa mehora e productu Aruba.

Renobacion di centro di Oranjestad, a cuminsa cu instalacion di un sistema moderno bou di tera den cua a hinca tur e kabelnan di e companianan di utilidad pa evita cu den futuro ta kibra caya cada rato cu un trabou cu mester wordo haci.

E parti aki ta completamente cla y por a mira cu a cuminsa caba

cu e fundeshi di loke ta bira e ruta di e streetcar, cu ta un di e componentenan di e proyecto Renobacion Centro.

E parti di embeyecimento ta ensera compra di casi 300 mata cu ta wordo planta den henter centro.

E sorto di mata cu Gobierno kier laga planta ta di mas o menos 3.5m. Mayoria ta palma, pero diferente tipo di palma. E idea ta cu e matanan tambe mester brinda un poco di sombra, ademas di e diferente parasolnan cu ta wordo instala den henter centro. Matanan chikito ta wordo planta como adorno.

Tambe a tene cuenta cu comodidad di e clientenan di centro, pa cua ta bay instala diferente banki den sombra y e intencion ta pa crea terasanan chikito den henter e centro, combina cu diferente tipo di fontein como decoracion.

Pa crea ambiente, ta hinca tambe den e programa di streetscape instalacion di speaker den henter caya, dunando esaki un toke alegre, pero no molesto.

InfraTeam cu tin e proyecto aki bou di su encargo, a informa cu e destaho publico ta den su fase final. Esaki ta nifica cu e tres companianan cu a muestra interes ta bay haya nan informacion den e dianan aki.

Despues di e parti aki, nan tin dos siman pa entrega nan oferta. Esaki ta nifica cu den un periodo di mas o menos un luna, e proyecto di un par di mion florin ta wordo otorga pa sigui cu su ehecucion na final di mei, cuminsamento di juni. E meta ta pa finalisa e parti aki hunto cu e fase di ruta di streetcar pa inaugura e proyecto completo na fin di aña.